



selvaclub sagogn

**46avla radunonza generala dil Selvaclub Sagogn
vendergis, 27 da settember 2019 allas 19:00, Tegia nordica**

Perstgisas: Sepi e Petra Cavelti, Nadja e Paul Schmed, Thierry Littmann, Abraham Dolf, Sina Cavelti, Selina Shresta, Vanessa Panier, Curdin Bundi

Presents: 20 persunas (tenor gliesta)

Tractandas:

1. Beinvegni
2. Elecziun dumbravuschs
3. Protocol radunonza generala 2018
4. Rapports annuals
 - a) dalla suprastonza
 - b) dils caus Giuventetgna + Sport (Patric Caderas, Janic Camathias)
5. Rendaquen
6. Rapport dils revisurs ed approbaziun dil quen
7. Preventiv 2019/20
8. Contribuziun annuala
9. Elecziun d'ina nova actuara/d' in niev actuar
10. Program da lavur 2019/20
11. Orientaziuns e varia

1. Beinvegni

Nossa presidenta Marianna Manetsch fa in cordial beinvegni als presents ed arva la radunonza generala.

Ella constatescha che la radunonza generala seigi stada publicada 2 gadas el Fegl Ufficial ed ella Ruinaulta.

Davart la radunonza generala dat ei neginas propostas ni addataziuns pertuccont tractandas.

2. Elecziun dumbravuschs

Kevin Camathias vegn elegius unanimamein sco dumbravuschs.

3. Protocol radunonza generala 2018

Il protocol era publicaus sin nossa homepage tochen ch' ella ei vegnida stizzada muort renovaziun. Plinavon ein entgins exemplars dil protocols mess si a caschun dalla radunonza per prender envesta ina mes'ura avon la radunonza. El vegn buca pli prelegius.

Il protocol vegn approbaus unanimamein.

4. Rapport annual

a) dalla suprastonza

Marianna fa in sguard anavos sin la sesiun vargada e sereferescha sils suandonts temas :

Situaziun da neiv:

Igl unviern e la stagiun da cuorsa liunga 2018/2019 ein puspei stadas extraordinarias. Miez december ei la neiv artificziala vegnida furnida e planada, aschia ch' il temps tochen tier las grondas nevas da miez schaner ha saviu vegnir surmontaus fetg bein. Las cundiziuns da neiv ed era las loipas ein stadas naven dils 20 da december entochen entschatta mars fetg bunas. Per la preparaziun dallas loipas han Gian Soliva, Barclamiu Arquisch e Matthias Lombris procurau. Ad els treis in grond engraziament davart dil Selvaclub.

Eveniments:

Pervia dalla munconza da neiv havein nus stuiu desister dalla fiasta da neiv. Grazia alla neiv artificziala havein persunter saviu menar atras il test da skis da cuorsa liunga & il cuors da fuffergnar.

In jamna pli tard, ils 11. – 13.01. ha nossa JO absolviu in camp da trenament a Hochhäderich, nua ch' els ein quasi sfundrai ellas nevaglias.

Miez fevrer havein nus astgau festivar nossa fiasta da club cun ina cuorsa al' americaine, cun tscheina da raclette e cun in grondius buffet da pettas. A quella fiasta havein nus era saviu beneventar entgins da noss generus sponsurs ed engraziar ad els per lur sponsoring dalla nova vestgadira per noss' JO.

Cun la fiasta da finiziun digl Energia Alpina Nordic Cup a Sagogn havein nus terminau nossa biala stagiun da cuorsa liunga.

In grond engraziament a tuts trenaders, geniturs e gidonters per il grond agid a caschun dallas differentas occasiuns. Igl ei bi da veser quei engaschi.

Tegia:

La Tegia ei stada aviarta duront la stagiun quasi senz' interrupziun. Il team Amanda/Vanessa ha luvrau super. La purschida da cartas dil di e da sesiun, affit da skis e café ha carmalau biars indigens e turists. Ad Amanda, Vanessa e lur gidonters in grond engraziament per lur zun prezziau engaschi.

Damai ch' Amanda ha era abdicau sco meinategia, surpren Rainer Dunst da Sagogn la bitgetta ella tegia nordica silla nova stagiun d' unviern.

Ad el giavieschein gia uss bia plascher e bien success.

JO:

Ell' JO han era uonn rodund 30 affons priu part. Cun exzepziun digl εμπrem e davos trenament han tuts giu liug a Sagogn. Nos trenaders han sco mintg' onn realisau trenaments interessants e pretensius. Engraziel da cor a tuts trenaders ed a tuttas trenadras.

Plinavon astgein nus era uonn puspei beneventar duas novas trenadras. Gianna Jäger e Vanessa Panier han absolviu cun success il cuors dad J&S. Cordiala gratulaziun ad ellas duas!

Nova vistgadira dil club:

In punct culminont da questa stagiun ei segir stau l' equipaziun dalla JO culla nova vestgiadira dil club. Cun grond engaschi han Linus e Kevin realisau la cumpra dalla vistgadira nova. Ils sforzs han rendiu ed il resultat selai veser. A nos sponsurs ed en spezial a Linus e Kevin da nossa vart aunc inaga in grond engraziament per quella grondiusa prestaziun.

Claudia Jäger, che ha dapi onns administrau da vistgadira dil club, ha dau giu quei post. Engraziel fetg a Claudia per tia preziada lavur duront ils davos onns. El futur surpren Vanessa Panier quella lavur.

Actuara:

Suenter biars onns en suprastonza e plinavon sco meinategia, ha Amanda abdicau siu post sco actuara dil Selvaclub. Ella ha fatg quella lavur cun gronda premura e diligenza. En num dil club engraziein nus ad ella da tut cor per sia grondiusa lavur en favur dils affons e da nies club. Per il futur giavischein ad Amanda tut il bien.

Engraziament:

En num dalla suprastonza siara Marianna il plaid cun in cordial engraziament als trenaders per lur grondius engaschi en favur da nos affons, a tuts geniturs per il sustegn e per la motivaziun dils affons, a Roman per sia lavur sco coach e coordinatur da J&S, a tuttas gidontras e gidonters e secapescha als collegas dalla suprastonza per la collavuraziun fetg emperneivla.

b) Rapport dils caus G + S, Patric Caderas e Janic Camathias

La stagiun 2018/19 ha entschiet igl 1 da settember 2018 cun rodund 30 affons e 7 trenaders. Ils 31 d' uost ed igl 1 da settember ha l' JO passentau la fin d' jamna ella hetta «Crap la Foppa» sur Flem. Per ils 5 d' october ei plinavon previu ina spassegiada sil Péz Miezgi.

En tut han giu liug 40 trenaments ed il club ei separticipaus allas cuorsas digl Energi Alpina Nordic cup.

Muort munconza da partiziponts, ha ils Selvaclub buca partizipau al gi da G+S a Claustra ils 2 da fevrer.

Al gi da sport digl SST han uon mo fetg paucs affons priu part.

Plinavon fa Patric aunc in appel als presents da far reclama per l'JO, per ch'il diember d'affons sesminueschi buca puspei marcantamein ils proxims onns. En quei connex eis ei previu da dar giu flyers ella scola a sagogn e plinavon eis ei previu da menar atras 1 – 2 trenaments da fuffergnar

Patric engrazia als trenaders, spezialmein a Janic per sia collaboraziun, allas giuvnas trenadras Sina e Selina ed alla suprastonza. Plinavon era da sia vart in special engraziel a tuts geniturs per lur sustegn duront la stagiun.

5. Rendaquen

Il cassier René Wellinger explichescha il quen annual 2018/19. La facultad dil Selvaclub munta ils 30-9-2019 sin frs. 78'851.52. Il quen 2018/2019 siara cun ina sperdita da frs. 5'055.58. Risguardont il fatg, che l' investiziun ella nova vestgadira per noss' JO munta sin frs. 33'102.25 ei quei in quen fetg legreivel. E quei buc il davos, grazia a noss generus sponsurs.

6. Rapport dils revisurs

Ils revisurs Enrico Arpagaus e Hans Niederberger constateschan che tut las quittanzas ein avon maun e che la contabilitad ei vegnida menada schuber e bein. Enrico engrazia a René per la buna lavur prestada ed il grond engaschi en favur da nies club!
Il quen vegn approbaus unanimamein.

7. Preventiv 2019/20

Per la proxima stagiun quenta nies cassier cun ina sperdita da frs. 7'070.--. En quei connex propona René alla radunonza generala da scriver giu las «Investiziuns renovaziun Tegia Nordica» da rodund frs. 15'856.90 en ina suletta ga. Sia proposta vegn approbada unanimamein.

Marianna engrazia fetg a nies cassier René per sia grondiusa lavur.

8. Contribuziun annuala

La suprastonza propona da schar la contribuziun annuala sco tochen dacheu.

La contribuziun per commembers A duei restar sin frs. 40.- e commembers dil SST pagan naven da 18 onns medemamein la contribuziun da frs. 40.- (analog comembers A) e persuerter negina contribuziun pli per l' JO.

9. Elecziun d'ina nova actura/d' in niev actuar

Deplorablamein eis e aunc buca gartegiau d'anflar in/ina successur/successura per Amanda.

Marianna resumescha per quei aunc inaga court las incumbensas ch' il post sco actuar dil Selvaclub portan. D' ils presents ei deplorablamein tuttina neigin promts da surprendre quell' incarica, aschia ch' il post d' actuar statt vinavon vacants.

10. Program da lavur 2019/20

Drizzar en pil menaschi d'unviern	23-11-2019
Test da skis	04-01-2020
Fuffergnadi e fiasta da neiv	05-01-2020
Cuorsa Energia Alpina Nordic Cup a Sagogn	11-01-2020 (ev. cun fiasta dil club)
fin dalla stagiun	08-03-2020

11. Orientaziuns e varia

Uonn ei previu d' illuminar la loipa da notg il margis, la mesjamna e la gievgia Quei mintgamai dallas 18.00-21.00 (cun tualetta publica aviarta).

En quei connex informescha Patric, ch' igl ei uonn era previu da menar atras la mesjamna in trenament per in e scadin. Geniturs sco affons dall' JO ein envidai cordialmein.

Informaziuns detagliadas suondan.

La contribuziun annuala pils affons dall' JO resta sco dacheu sin frs. 120.-. Quella summa cumpeggia l' affitaziun dalla vestgadira ed il daner da partenza per las cuorsas.

Era uonn absolvescha nossa JO in camp da trenament. Il camp ha liug ils 21 e 22 da december cun surnotg si Bargis.

Il gi da G+S ha liug uonn, ils 18 da schaner a Trun. Ord quei motiv vegn nossa cuorsa digl Energia alpina nordic cup a Sagogn menada atras el stil classic e quei gia ils 11 da schaner 2020.

Kevin informescha, ch' il club ha cumprau novs skis da rodas. Ei vegn perquei a dar dapli trenaments sin skis da rodas, aschia ch' ils affons han schon baul in bien sentiment sils skis cu la stagiun va liber.

Dils presents vegn constatau, che mo paucs geniturs che han affons ell' JO ein presents alla radunonza generala. Per il futur ei da ponderar, che la radunonza generala ei obligatoria per ils commembers e per silmeins in genitur d' affons che partizipeschan ell' JO.

Marianna engrazia als presents, envida tuts alla tscheina ella Stiva Grischuna e siara la radunonza generala allas 20:30.

Sagogn ils, 18 da november 2019

Harald Schöpf